





古之為詩多抱至性挾奇氣與天地間日月星辰風雨
霜露山川草木以及人倫境遇幽奇百怪之物相觸而
發於辭有纏綿愷惻之情抑揚徐疾之節長短清濁之
音金石憂而笙鼓諧使人聞之躍然起油然化喜者拍
舞怒者皆裂樂者心開哀者涕落故三百篇後獨稱屈
宋之騷漢魏唐宋詩之佳者亦莫不然乃知詩者貞臣
孝子壯夫志士所能為彼漠然寡情與夫庸庸瑣瑣無
關於物者皆不足與於此也吾同年友謹齋先生自少
卓犖不為俗所羈篤於倫紀于讀書外無所嗜好為詩
文超軼倫等出宰鐵嶺恢恢政事奏績居第一

天子東巡狩獻賦擬兩京三都灑灑數千言蒙 旨嘉
獎恩賜優渥入爲戶部擢給事中侃侃數陳時事直聲
著於朝野顧以直言忤物致官而歸築室淮陰攤書數
萬卷大肆鑽研恣其漁獵徧遊東南佳山水與詩翁衲
子結契當其花晨月夕呼賓召友彈絃清歌引觴輒醉
欣然自得幾不知世道之險夸人類之臧否相忘而俱
適人皆稱爲達者及乎凝睇沈思百憂並集欲爲而無
可爲有言莫可告語搔首問天一倡三歎湘靈或從而
太息山鬼啾啾然疑作矣如是者十年其觸境彌變力
學益深感

九重之知己警陸海之波濤期於讀書報稱賦詩善鳴
而年將垂白精力非復少壯每與予言未嘗不拊髀而
歎也先生向有京華遼海西湖使閩諸集極爲阮亭竹
垞兩先生所賞海內知詩者亦既同聲歎服矣茲復彙
其所著寓書京師謂投閒十載爲詩更多惜二老不可
作今海內知詩者唯匠門及查田盍爲我序之予何敢
當斯言先生抱至性挾竒氣發而爲詩喜怒哀樂一出
於風雅屈宋之遺故能擷唐宋之菁英傾漢魏之瀝液
卓然自成一家阮亭司寇稱其善學古人兼長備美竹
垞太史稱其才大筆精漁洋嫡派皆非虛言也查田今

之詩伯高臥海濱先生自淮涉江一航千里同居倡和
樂不可支唯予以多病之身留滯冗散之地遙瞻故人
徜徉方外吟其所作勞我夢魂其為可悲豈能以言盡
耶書此以復謹齋寄眎查田先生云何也康熙五十五
年季秋月朔日嘉定張大受序

給諫謹齋先生者卷懷經濟久放浪於名山雅負才華
半消磨於壯歲陳元龍湖海之士豪氣不除謝幼輿丘
壑之姿風流自命誠為騷壇宿將不愧海內奇人僕者
埋光鏟彩每漱石於湖西問水尋山偶挂帆於淮右詩
豪把臂且雄風月之談酒次論心漫慨升沈之局而乃
盤娛泉石痼癖烟霞陶輿則左右輕扶謝屐則高低閒
着看此時之鴻鵠高舉空冥問當日之豺狼退歸何黨
人云奏議多吁咈而少都俞我讀詩篇有和平而無怨
悻蓋昔者曾過武水徧訪吳山田居槃敦以賡酬謂龔蘅圃侍御
莘野墳篋而荅和謂許畱農進士攜將二客赤髯俱從妒殺三人

旗亭共唱有奇必探隨景都搜海日江潮豁胸襟而遠
到湖光山色

湖光山色集先生
客遊武林之作

敘目錄以新標能使西施特

開生面如逢東野肯惜低頭然而靈隱韜光竊窺斑豹
掖垣遼海更探驪龍化絃歌於鐵嶺 天子褒其循良
補諫牘於綸扉朝野知其顛直歌詠胥關於吏治諷諭
亦贊夫 皇猷至其持籌農部扈蹕咸京分夜直于九
霄隨使星于八月虛槎閩嶠普雲漢以作人索米京華
待雨霖而用汝

舊有遼海掖垣
京華虛槎等集

著作等身篇章滿篋及其懷

青山而一往賦三徑以來歸雲海之臥遊恣其嘯傲江
山之風月供所取攜羨李白之才仙胸中浩落比杜陵

之詩史筆底沉雄得奇闢於韓蘇法渾融於王孟禪宗
妙悟會滄浪之微言備美兼長服漁洋之定論詩原不
少除非刪訂仲尼樂自可知或得請觀季札合羣怨興
觀之旨備宮商角徵之音見說曹劉應歸上品定知燕
許不落中唐此有識所共知非阿私之謬說僕千里浪
遊一言弁首奏高山以傾耳鍾期敢謂知音綜三賦以
論文元晏寧辭作序錢唐章藻功拜手

山陽許謹齋先生讀書嗜學矜尚氣節爲文敏妙一以
古人爲師自少時已負海內重望及登仕版膺民社當
盛京左海之地拊循綏靖雖外藩諸部落咸頌其賢歲
在戊寅

天子東巡狩 召見之問其所學奏詞賦數千言蒙上
林羽獵之賞拔置郎署旋拜諫大夫蹇蹇諤諤有古名
臣風封章頻上一皆經國之重務每部議有難行者
天子優詔施行之然天性戇直不避讐怨彈劾所傷輒
多投鼠之忌久之乃拂衣以歸蓋先生風稜峭厲秉正
不阿直聲動天下焉余知先生也久矣癸巳之夏復晤

於匠門檢討邸形神發越對客揮毫意氣故自若也今年秋訪余秀野草堂酒酣耳熱出近詩若干卷見示伏而讀之其思深其力厚其取材博而用意精如驚風驟雨雷霆礮礮精銳莫可當也如長江大河波湧濤起浩瀚衍溢而不可遏也如春花秋月旖旎嬋娟賞玩怡情而不能舍也又如羅綺滿堂秦箏趙瑟練色流聲動心悅耳不能禁也蓋先生之學研窮變怪而造詣于淵微直欲上追風騷馳騁漢魏貫穿唐宋以來之作者而排冑橫空於一代視今之沿揣聲病剽竊字句依傍他人門戶者不可同日語也然使先生端委廟堂發抒蘊蓄

其所樹立裨益天下者不知何如而乃蕭然高寄以慨慷激越之調寫忠愛悱惻之忱有識之士為之擊節而歎歎矣余屏居閭丘獨唱寡和長淮一水期與先生詩酒往來同聲相應讀是集而仕宦之升沉友朋之聚散不能無感于其際也康熙丙申冬十有一月長洲顧嗣立序

文章事業古人每以兼優爲難唐以詩賦取士而房杜
佐命篇什寥寥王楊沈宋鼓吹休明而政治略無所表
見求其豐功偉業身名俱泰如燕許之大手筆則又其
遭遇過人者矣故忠君愛國如少陵初授諫官一試即
蹶其生平固以稷契自許者使得致位鼎鉉燕許之業
當不足多而乃放棄流離徒爲哀江頭之野老又可悲
矣然其退爲文章上追雅頌下仿騷經忠愛之誠老而
彌篤東坡有言舜舉十六相身尊道何高秦國用商鞅
法令如牛毛故是稷契一輩人語以其文章信其事業
燕許諸人瞠乎其後矣謹齋先生以年少巍科試割劇

邑賢聲報最敷歷清班不可謂不遇東窮左海西涉秦
封南使越閩北走燕晉舉凡邊塞風沙江山險阻奇秀
百出蒼涼萬狀無不會之於心以富其所學宜發於詩
歌之洪以越也獨是先生賦性剛介利害不搖其在諫
垣也以職所當盡不敢緘默取容封事彈擊披肝膽而
犯逆鱗及其屏處海濱丘園養晦優游嘯咏未嘗以窮
達介意夫詩道性情性剛者其聲必大使其涵養不至
直而易盡豪雄之氣一往無餘君子有以測其器量今
三復先生之詩格調既高諸體悉備於沈雄博大之中
寓抑揚頓挫之旨一唱三歎宜雅宜風則先生之所

可知矣予學宦未達困於奔走十年道路而青衫如舊
丁酉十月重訪先生於淮上時大雪初晴圍爐促膝把
酒論文服膺無數乃走筆而序之後學木蘭山人劉浦
題於淮干旅次

春日齋居讀許謹齋都諫詩集漫題三首

浙西朱星渚

三春常鍵戶幽憂輒相撓竟日但枯坐何者移吾情開
帙得君詩泠然冰雪清如玉瑩且潔如珠圓復明想見
下筆時健若鷲鳥征盤旋更下上逸勢空中橫又若水
決渠滔滔注滄瀛縈紆而曲折到處波瀾成流覽齋心
目快若醒宿醒神融氣和洽點筆歌嚶鳴

三唐推傑出曰惟甫與白後起昌黎公大手恣擘畫今
代惟漁洋獨主斯文席入室有先生妙合絃上拍領會
最微茫傾吐總瀝液紛紛著作家下風盡辟易奈何雲

霄姿早斂廊廟跡牛鐸與瓦缶合樂自疇昔皇皇雅頌
音何當播金石寶茲名山藏騷壇幟應赤

頃者四月中談麈得一接六義探真源百家陳盛業其
言極泛濫其旨歸妥帖流派雖或殊縱橫固不協乃知
擅專場裁制有箝鑷微旨探天根妙理呈目睫摧堅信
所長語難不少怯譬如數家珍琳琅滿篋篋我欲挹天
漿盡浣塵土劫願假飛霞珮爲我繫腰袂

虛槎集者余奉 命使閩所作詩也歲在壬午偕索大
理擎石典七閩試事往返六閱月計程且及萬里山川
景物目不給賞徒以郵驛嚴程未遑流連周覽搜爬而
剔抉之道途勞勩之餘乘輿有作總二百五十餘篇名
其集曰虛槎志愧也司寇阮亭王夫子秀水竹垞朱先
生見而賞之謬爲論定存之篋中十年矣今年夏六月
偶有三衢之行質之同學張定陽天農江山舊游風景
如昨而大理及王朱兩先生皆下世蓋不勝今昔之感
焉天農語余曰風雅之道本乎性情性情之言因乎感
觸名山大川之氣候蟲時鳥之音此天地自然之文章

發於聲象之表者適與吾之性情相遇或望古而遙集
或撫事而會心雖馳驅行役之間不經意而出之君子
每有取焉吾嘗南泝沅湘北走燕薊二十年内吟諷約
數千首把酒拈鬚意頗自壯就正阮亭司寇亦謬稱爲
作者然漫不檢拾散逸多矣是編宜付梓人抑亦新城
秀水之遺意也余惻然感於其言蘇文忠公云人生到
處知何似大似鴻飛踏雪泥司寇嘗引以序余之詩虛
槎之梓其亦飛鴻之雪泥云爾己辛卯八月謹齋自識
於章江舟中

謹齋詩稿

淮海 許志進 念中

虛槎集

壬午年六月後作

奉

命典閩試 陞辭恭紀二首

日麗龍樓曉雲凝 帝座開直言容補牘簡命急求才

使節從天下英賢入彀來太平文治洽聲教暨彭臺

下詔求言

愚艱應無似持衡向海疆致身希稷契報 國以文章

風壤遐荒異英靈 聖代昌 天書新拜賜萬里奉恩

光蒙賜御書於中和殿

瀕行留別勞都憲介巖李閣學惺菴張司寇劬齋
王司農公垂四先生王都憲西澗宋都諫堅齋
湯都諫西厓傅都憲濟菴周都諫弘濟嚴編修
思菴黃編修崑圃李檢討渭湄諸同學兼寄故
鄉親友三首

紫宸冠劍接清標，戇直猶能托聖朝。
暫別鵷鷺持使節，初承綸綍下丹霄。
槐花驛路沾秋雨，閩海星槎趁早潮。
此日青門同折柳，矢將精白答神堯。
鯨鯢息浪靜烽煙，文教覃敷六十年。
翠嶂錦厓通越嶺

青楓紅荔認蠻天，功名汗簡推良相。
道學源流幾大賢

聖主作人歌，棧樸海山深處網羅偏。

五六謂宋明諸名臣之產閩者

觸熱輕裝叱馭行，帝鄉南望白雲平。
青袍未負書生意，綵服偏縈子舍情。
伏謁不煩馳候吏，承歡且計緩王程。
閩關往返遙相訂，萬里琴書一鶴清。

盧溝橋曉發，示索大理擎石

月印桑乾碧玉流，雙輶侵曉發盧溝。
馬移人影過砂磧，風捲濤聲撼戍樓。
閩嶠烟嵐收客路，幽燕山靄繪神州。
共君江海量才遠，弩矢前旌紀勝遊。

輿中望西山作

都城望西山百里見空翠濛濛軟紅中遐心寄深喟朝
來快親覲行役茲偶遂眼明馬首西巉巉初拔地屏藩
亘千里勝概標往記三關扼塞垣時平罷烽燧鬱鬱積
萬仞遥遥送旌轡後者顧欲留前者拱而遲是時當溽
暑陽曦赫方熾白雲初英英雷雨忽漸被回看三兩峰
青青矗烟際

良鄉道中

灰洞奔車此路長五更烟月過良鄉不知獨鹿山多遠
且趁清風拂曉涼

琉璃河

疊石橫空碾路塵長橋飛水滙天津河干車馬多如蟻

閒看鴛鴦得幾人

范致能詩云琉璃河上看鴛鴦

涿鹿懷古

每行范水道悵望華陽臺不見樊將軍燕丹安在哉黃
塵翳白日原野多蒿萊易水風蕭蕭日暮流聲哀蒯生
希儀秦雋永非凡才亦有盧尚書卓為士模楷如何千
載下山色空崔嵬飛雨滌炎暑古道清烟霾指點督亢
陂形勝猶天門

次汪太史安公留別韻二首

時奉使粵東

旅館宵分絳蠟紅樓桑笳吹引清風坐談不厭三更後

客路難消六月中
疊嶂層灘餘善國
蠻煙瘴海尉佗宮
與君細酌新昌酒
馬首明朝各轉蓬

五羊城畔海濤奔
越秀山高上白雲
新會荔枝甜勝蜜
博羅蝴蝶大於裙
莫嫌上谷征塵合
行到江南水驛分
此去炎荒真萬里
歸囊詩律更超羣

雄縣道中

古驛鳴雞過易陽
瓦橋關外月如霜
行人莫照滹沱水
十載風塵鬢已蒼

趙北口泛舟因寄故園親友

疎柳長隄入畫圖
清風颯颯動菰蒲
花如翠袖偎紅粉

荷花數十里風景不減江南也

人似寒冰暎玉壺
客路扁舟替鞍馬
使臣歸夢繞江湖
雙魚到日應相憶
趙北燕南吟興孤

河間二首

九河故道考茫茫
古驛征塵暎日黃
瀛博遺墟迷覆釜
滹沱屈注滙清漳
殘城望氣無鈎弋
荒艸空阡弔獻王
何物張劉亦齊楚
難從龍戰論興亡

衛淇濡易浸連漪
地利難尋子貢陂

是時方言水利

黃犢烏犍閭

左佩青絲白馬射
生騎斜陽古戍毛
公里細雨青林董
相祠誰道嚴軍營
細柳南塘近出且
兒嬉

阜城道中念元遺山詩感賦

漫詠無鱗殺癩飛屬車曾載鮑魚歸胡盧河畔沙丘路
一片黃塵上客衣

德水懷田少司農因寄漁洋先生二首

老作京華戀何人早拂衣君恩容謝病吾道貴知幾

曾廁司農掾長嗟時事非公官戶部時有者專甚爭之不得乃拂衣去吳川讀書

處鷗鳥共忘機

當代論詩匠山東兩侍郎盤空排硬語兀冪有山薑山薑

田公別號也我是蘇門士南豐一瓣香平原此傾蓋搔首對斜

陽

題驛壁因東擊石二首

小飲羅家酒閒停德水驂清宵有明月煙水夢江南

燕趙風塵盡齊州景色新遙知念行役惆悵倚閭人擊石亦具

慶

弔平原都憲

再作南疆鎮重提西府綱功名在江海風節激巖廊
聖世無鈞黨陽春有雪霜豐碑空矗矗歎息老成亡

禹城道中雨

底績懷神禹遺封認祝阿蟬聲沸驛路樹色暗沙陀曠
野黃河盡青山渤澥多平疇交急雨鞍馬涉盤渦

齊河道中大雨水

不辨齊州路雲陰白雨多伏流駛清濟奔浪失黃河古
驛墮垣濕沙田匝地波大東民力盡天意更如何

泰安道中

靈岳開東帝岩堯望岱宗雨將青嶂洗天以白雲封練
馬渾難辨巖巒知幾重何當登絕頂長嘯俯諸峰

夜半登泰山看日出歌

我行齊州道長日苦陰雨山程蒸濕不快意拔地千峰
睇天宇丈人招我扶修筇振衣飛上青芙蓉夜氣蒼涼
山徑滑手排星斗摩蒼穹秦碑漢碣不可識惟聞蕭蕭
清籟穿喬松羣峰約束近可數樓臺夜敞天孫宮一聲

長嘯動青帝空山草木鳴天風是時微月下西嶺坤維
晦冥天濛濛不知身在萬山頂但見海門洶洶波濤紅
火輪耀水出未出一人捧上扶桑東羲和纜總六龍轡
青方朗照烟霾空雷霆下界響巖谷六合時雨占年豐
此景欣意得未睹掉頭晞髮凌鴻蒙美人練馬不復辨
白雲長護軒轅封嗚呼紛紛七十二家後何人玉檢來
升中

泰山雜詠六首

雨歇紅亭渡雲屯玉女峰丈人不可即山晚一聲鐘
古澗走玉龍冷然沁心骨星斗落天河手澣半輪月

禮樂百年作明堂封禪基秦皇太鹵莽風雨蝕殘碑
漢代乾封日孫卿死不仙銅人空下淚金母去何年
薄海崇淫祀峰頭着碧霞泰山愧林放柴望記重華
五岳游教徧空懷尚子平長鑱白木柄他日斲黃精

徂徠道中二首

不識竹溪蹟徂徠千仞青醉鄉林壑美李白此沈冥
雨過山烟碧溪迴水石清閒心戀丘壑落日忘去郵程
風景江南似留連使客情回頭望山色高與岳雲平

雨行占示擎石

絕壑巉巖不可梯濕雲飛度萬峰西不知今夜宿何處

冷雨蕭蕭過碧溪

新泰道中
晤北山涂文學見投佳作率此奉酬

幾驛坡陀帶雨行雲峰漠漠樹冥冥豐碑漸近羊公里
名士新來歷下亭席帽尚沾餘濕重客醒欲傷晚風醒
清詩贈我同金錯况是他鄉聚水萍

新泰大水壞城郭廬舍漂禾拔木過羊流作

古木漂頽岸波痕破屋平蛟龍鬪風雨水石捲山城不
識羊流店空傳太傅名子遺仍幾輩悽惻路旁情

蒙陰道中懷友二首

直巔巔東蒙山外山行程遙問紫金關蒙陰悵望龜陰道

碧樹煙村水石閒
潺湲急雨瀉幽溪轉厭噴
崕滑馬蹄惆悵名山千百疊
不教攜屐上丹梯

沂州道中二首

巉巖六百里黛色漸開明
一水抱城曲飛流過雨清
勞人厭車馬幾日尚山程
龍臥名賢地空傷出處情
驅車齊魯道長日困炎蒸
青山合四圍十里殊陰晴
鳴蟬沸深樹白雲翳以興
好風自南來煩暑倏然清
山開天宇曠水碧心目澄
連林帶叢薄古驛趨郟城
問官走尼父傾蓋交先生
緬懷賢聖踪薄暮空餘情

峒嵒

每厭青駝路荒荒幾驛孤
馬蹄亂沂沐山店到峒嵒
漸入江南境陰多暑氣徂
扁舟擊楫去清興托江湖

中河舟中

避險初分激箭波馬陵燒斷碧
嗟峨誰教大汛當三伏
更灑飛流似八河劉老澗
滄無尺土王營壩決走盤渦
老成長慮非今日二十餘年
變故多

黃河舟中

是日大風雨河決桃源舟過烟墩幾覆

舊狎奔流險輕身試森瀾蛟龍鬪
河伯風雨走支祁蟻穴沈三版
矛頭寄一炊一食頃舟駛百餘里決排師故智
譬馬亦何

爲

過里門敬爲家大人稱觴因示弟姪

此行最喜得趨庭水驛郵籤且暫停親串幾人看使節
弟兄三載感勞形秋生南國山川美老念高堂鬢髮星
行役未遑溫清缺稱觴惟是祝遐齡

登舟別親友

畫鷁風簾映碧潯故鄉親友惜離衿白波翠嶂三秋路
明月青天萬里心廿載辛勤仍故我一生清白守遺箴
扶搖各有培風翼鴻雁高飛送好音

時象坤諸
子方就試

白田道中二首

十日陰多一日晴海天涼雨足離情扁舟習習風吹面
大勝燕齊觸暑行

黃浦溪前風緩吹白田堡外雨如絲停橈坐聽漁郎笛
楊柳陰陰睡醒時

晚晴

沸耳蟬聲樹樹同雨晴吹斷綠楊風釣槎水滿鳧鷖浴
時有蜻蜓掠水萍

秦郵雜詠五首

甃社湖光清可憐蒲帆鷗鳥動淪連空煩賈讓陳三策
依舊淮南水拍天

終日山行每厭山道
淮空有碧潺潺東蒙
萬仞閒無用徑欲移
來着此間

湖上文游剩古臺柳
風溪雨拂蒿萊蚌珠
海月爭明夜應有騷
魂聯袂來

城外珠湖水拍隄漁
罾蟹斲聚流離荷花
荷葉兼天淨只少鴉
娘唱竹枝

天然六壩建瓴新三
十年來尚陸沈一掬
露筋祠外土神鴉社
鼓綠楊深

揚州晚泊懷范村工部

沸耳笙歌廿四橋蕪
城燈火照清宵秋生
野岸鳴巖柝

月上僧樓見晚潮鄉
夢一涼侵枕簟客程
明發望金焦吟詩水
部仍官閣惆悵離心
酒不消

瓜洲曉發

鳴鈺破殘夢揚舲趁
潮水岸柳動西風秋
聲到揚子

江上二首

晴煙漠漠水泠泠鼓
角聲臨鐵甕城萬里
江濤秋色遠一天海
日早潮平山多遙認
南朝寺地險常屯北
府兵兩點金焦勞望
眼登臨不盡古今情

維舟一上江天寺振
策遙看吞海亭樓閣
倒懸江練白風濤斜
蹴海門青鳥依香界
雲煙淨龍起秋潭艸
樹腥

不向松寥問高隱一杯吟嘯對中冷

潤州詠古二首

丹陽北固古吳關江抱重城海抱山不見周郎破曹處
碧天如鏡水雲閒

外甥豔說何無忌生子人誇孫仲謀一帶江山殘照裏
西風回首杜鵑樓

丹陽道中

畫舫丹陽道澄波落日明涼生練湖水月上呂蒙城弔
古論殘劫澆愁命麴生蒼蒼雲樹裏薄暮起秋聲

錫山雜詠五首東貽京同年

季札祠前夜雨晴芙蓉塘外曉雲輕溪光山色青於染
不聽松聲聽水聲

不見蒼虬屈鐵姿清風最憶聽濤時幽篁滴瀝松杉雨
重拜南朝孝子祠

霧鬣風鬟控九龍天風吹上大茅峰洞庭烟水寬何許
看盡雲山七十重

古木陰森張許祠姚闇雷萬南霽賈賁總男兒何人吹
笛山頭月尚想雲深戰苦時

溪流漾月白於沙泊處依然近酒家夜靜無端吹玉管
半牀清夢隔烟紗

虎丘和高兩詩

短簿祠荒艸樹春
闔廬塚下水粼粼
山川霸氣收金虎
巖壑清姿見晉人
雲外塔鈴風自語
峰頭海月夜相親
不須漫話興亡事
煙景蒼涼又幾塵

舟中望靈巖諸山

輕舟趁微風斜日半篙水
十里遠城郭圖畫空明裏
林端表孤塔拔地羣峰起
煙景晚溟濛濃翠撐喂蝟
靈巖挺一笏支硯靜隱几
往者禽向遊幽探嘗曳屣
響屨認遺宮錦帆汎清泚
沙鷗五湖路日月行杯底
薄暮一登樓千山浸淼瀾
梵天清夜夢爽籟消塵滓
頻年世網縈

結想林巒美茲行失攀躋
戴笠畏炎曷霽宇望遙碧
涼氣生衣履不作買山人
鬚眉信堪鄙

長橋對月

魚龍偃浪夜無聲
銀漢疎星與地平
五十三潭浸秋月
今宵偏爲一人明

秀州懷古

歌管由拳道煙花醉里城
霸圖銷歇盡王氣古今明
富貴悲翁子兵戈托晏嬰

五代曹師魯

空留長水讖東道
祖龍行

抵杭州夜柬擎石

明湖長憶舊風烟
再到杭州又此年
勝地山川留使節

名都今古認桑田三千曠弩江湖落十二長橋夜月懸
明日柳塘花塢去沙棠重訪鷺鷥天

湖上和兩詩四首

爲有停橈便能偷一日閒扁舟問烟水把酒對湖山積
翠橫眉黛澄波瑩玦環雙峰渾舊識招我白雲間
乍泛蓮塘北還過柳浪東陰晴衆峰雨涼燠一池風弔
古靈芝院尋幽處士宮山川與梅鶴感興綠樽中
記得南湖寺琳宮化老家雲峰仍慧日石室自天花山
樹迷空翠池荷浸落霞黃皮孤塔迴吟望興還賒

山外青山好難爲觸熱登

湖上諸山以虎跑烟霞水樂諸處爲幽勝匆匆不暇遍及也

重尋三

竺路試訪六朝僧古寺看流水高峰不杖藤撲人空翠
裏巖壑欲飛騰

錢王祠二首

割據東南十四州明湖王氣未全收魚鹽小試英雄策
江海平分霸業優山着錦衣明石鏡城裝鐵弩却潮流
靈芝廢院荒陂水颯颯西風菡萏秋

祠下豐碑委斷煙臨安舊事總茫然一江春水愁思裏

江南李昱

十里湖山黯淡邊白馬中興仍半壁紅羊換劫又他

年六陵遺恨知何許鬼火冬青叫杜鵑

江干夜泊先寄李富陽

樟亭今夜泊月色動明流海氣侵吳嘯潮聲撼越州孤
燈山寺暝歸夢玉京秋明日春江上同登第一樓

雨望

驟雨還停江上艫望中烟景入模糊雲山疊翠迷深遠
天地蒼涼認有無暑氣頓收三伏盡濤聲平挾兩潮俱
清詩吟罷蛟龍起搖兀篷窗客興孤

江上行

照眼江光初上日使客船開江上驛越山秀色曉迎人
千峰萬峰江岸出近窺妝鏡芙蓉鬢遠彎眉黛冰玉顏
白雲翳翳不到地變滅杳靄虛無間客船移處山亦走

煙嵐出沒龍蚴蟉坐餐蛾綠失調飢泰岱東蒙盡粗醜
西興對岸秋氣新江潮欲上水生鱗翠屏丹嶂一千里
記取乘風破浪人

春江道中

江淺漾空碧沙明見隱鱗雲生知有雨村靜似無人煙
水迷秦望樓臺見富春西南山愈好指點問前津

桐廬道中用蘇詩舊韻

輕舟竟日越江行浩浩天風激水聲樽酒放歌時擊楫
戍樓迎客遠鳴鉦雲連鷗鷺飛邊白秋向烟林暮處清
欲就桐君拾瑤艸荷鋤江岸混農耕

桐山僧舍二首

漾日晴波深見底
屯雲高嶂翠浮空
山僧愛向雲山老
煙水光中湧梵宮

浮雲起滅淨無因
謾認飛花落錦茵
我笑開元房次律

却煩和璞証前身

開元中宰盧
在夏口村
佛寺桐僧忽漫及此故云

江雨

船頭白雨掀篷入
江上清風撲面來
稍厭青山遮客路
天教風雨為移開

七里瀧

行過越溪三百里
布帆無恙信風吹
雲封嶺樹村村白

山轉灘流寸寸奇
抱葉鳴蟬當午沸
穿林翠羽避人遲
遠遊綽有鱸魚興
閒看兒童放釣絲

嚴瀨詞四首

下灘水急上灘遲
流水聲中唱竹枝
橫掠黃牛凌鰲甲
大家作力過鸕鷀

為問羊裘老釣徒
雲臺高似釣臺無
故人鼎鉉防腰領
滋味何如一尺鱸

清波慢蹴上灘船
雙峽流泉寫七絃
不似下灘爭一瞬
烟雲過眼便茫然

兩邊青嶂劃江開
江上帆檣日往回
借問客舟何處泊

偷閒肯上子陵臺

釣臺四首

兩臺高峻特甚明人以爲不可持釣至以千尺絲百尺竿之句勒之石上可笑也

故人江海興身世一鴻毛
應笑任公子辛勤爲六鰲
但得垂綸趣何須百尺竿
子陵千載士占斷越西山
下士嫻媮合貞夫獨殉名
白雲源外隱且復錄元英
扣石悲朱鳥魂子歸去來
心傷謝臯父不忍上西臺

建德道中

睦州南去總淵渟翠巘千重映淺汀
寶婺欲開金洞秘客星猶望釣臺青
漁樵地着山川美圖繪天然艸木靈
聞說蘭陰多勝蹟水窗冰簟考圖經

瀨石

濺濺瀨石響空灘水國陰多七月寒
疊嶂參天無去路奔流赴壑有回瀾
人如猿狖升青壁舟似鮎魚上竹竿
世路從來有巖嶮莫因平易忘艱難

斷崖

灘急誰能盡日行斷崖高樹午風清
水天藻荇牽雲影巖屋垂蘿挂鳥聲
靜愛山光留客住去慚人力與天爭
青青兩岸峰無數歎爾長年管送迎

蘭溪估客詞四首

蘭溪溪水碧油油溪上兒郎花滿頭
聯袂踏歌何處宿

月明估客木蘭舟

阿儂估舶向金閶烏石山前是舊鄉船泊江干作鄉語
大家沽酒酌何郎

江月油油江水綠歌殘酒醉聯舟宿笑煞襄陽好女兒
大隄空唱銅鞮曲

郎似浦陽江上流曉風殘月送郎舟儂似後溪村外塔
盼郎江上不回頭

金華

金華三百里煙靄望中迷深樹臨江碧遙天映日低星
輝凝婺女秋色浸蘭溪欲訪洞天去雲巖應可栖

晝寢戲呈擎石

晝寢不辭同朽木推蓬畏熱枕滄江殘書倦睫無十里
白鳥好音時一雙急雨送涼清筦簟遙山飛翠入船窗
先生正有鄉園夢何處烟樓鐘又撞

清江試浴戲擎石

戲浴清江日未晡炎歊脫體一亡逋潔憐秋水澄泥滓
朗似寒冰浸玉壺林樾振衣履蒹席晚涼晞髮詠風雩
兒曹滅頂誇深涉此事真應獨讓渠

灘窄

自富春至嚴州山環水急寸寸鬪奇至蘭溪龍
游則山開林遠風景一變然灘愈高水愈急矣

灘窄水愈急林寬山漸遙牛閒朝放牧碓響夜春濤溪

女浣寒練魚鴉認小舸江鄉風自古舟楫此生勞

橫山夜發三首

中夜不能寐起看星滿天銀漢西南垂江流浩漉浚清
颺靜林樾艸蟲聲寥然坐聞跋浪魚潑刺驚扣舷蒼山
何岩堯寂歷橫秋煙客行良有程觸熱心憂煎胡爲行
多露混跡蛟龍淵黃頭急鳴鉦月黑爭奔湍

牽舟上灘行人語亂江水篙師狎頑石覓路崎嶇裏以
爾精猛力逸我烏篷底臥聽激箭流輾轉汗沾第了知
失清眠且復披衣起豈無當晝臥風蟬聒雙耳行役雖
云悴山川故可喜稍憶少年游悲歌一拊髀

灘鳴船逾疾壯心爭飛流回頭看斗杓身在越南州去
國幾千里遙遙將焉求江湖生白髮浩蕩驚沙鷗客思
何茫茫望遠生鄉愁蛟蜃蹴夜濤楓人語山幽海鶴萬
里心飛鳴凌丹丘人生有羈旅何爲生煩憂

龍游懷古

西漢當末流賢士勵風節山水擇名區棲隱懷芳潔子
陵釣桐廬龍丘臥姑蔑珠淵神龍潛丹山威鳳穴遂令
千載人恭敬生噦噪昨艤桐江棹清泉薦寒冽竭來三
衢游青山亘嶢絕斯人邈已遠身尊名不滅揚雄著美

新抗論希明哲元亭望龍山泰華臨蟻垤

西安縣

甲寅耿藩之變李武定拒守於此九龍山外皆戰地也

舊憶爛柯處今來弔戰場江山爭浩劫棋局辨興亡峰尚九龍峻人無一鶴裝月明聞夜柝烟水共蒼茫

橘洲

粉堞帶高樓人家在橘洲平林不辨樹落實已驚秋江上幾千本山中萬戶侯史遷收貨殖此地亦菟裘

舟人說蘭山幽邃漫紀二首

聞道蘭山險林深亦有蹊高峰撐漢盡古木障雲低魑魅迎人嘯猿猱攫食啼神仙不可即絕磴有丹梯

牛斗連常玉山川帶越閩龍蛇生廣澤寇盜介通津

此地向為

葉字留鄧茂七巢穴

礦閉求金客巖封採木人靈竅守溪口牲幣祝

明神

須江道中

水急亂灘高須江牽挽勞照人山翠滴求侶樹猿號秋色橫千里浮生感二毛江郎何處是客路正滔滔

清湖示擎石

船到清湖歇山從橫嶺通人家圍越嶠鄉俗雜閩風鳥語爭重譯蠻花問小紅客程殊未已清夜一燈同

仙霞嶺僧舍留二首

閩嶠分懸流直下各千里不知地維高但訝山形起紆
迴入層綠千狀變奇詭三峰渺天際翠色紛喂蠹行行
轉空曲秋日昃炎晷閩嶺此門戶疊石橫軍壘盤盤磴
道勞幽險逢山鬼當關守一夫九泥障捷軹胡為勞戰
伐豺狼已風靡時清通職貢車書正同軌使節出青霄
極目山川美
名山高不極上橫天半霞峰巒如赤城疑是列仙家瓊
樓連玉宇縹緲烟雲遮弩矢導前騶觸熱趨谿谷空山
過寒雨開徧僧廊花松竹交冷翠流泉澄凹窪好風北
牖來小住良復嘉行役亦云勞感歎修途賒

漁梁嶺

山經譜名山漁梁自疇昔長蛇亘僊霞粵閩橫一脊盤
盤三百里歷歷積頑石其下窟淵蚪其上控溟翻高峰
削萬仞巉巖僵一碧人行松杉巔雲起絡虛白俯下澗
壑幽丸脫不可搯忽復翼青霄習習風生腋雙竿轉紆
縈五顯同迫窄皆嶺名三日嶺中行心目騁煩劇越山千里
秀到此變奇闢搔首問烟霞吾生幾緇屐

仙霞道中寄家弟二首

嶺拂烟霞鳥道通盤旋一氣俯昭融天開錦幄雲屏裏
人在松濤竹韻中秋色西來回巘嶧水聲東去闢鴻濛

離心百粵雄關外矯首鄉園但碧空
翠巘紆迴怪石蹲天風吹客躡雲根摩娑牛女雙星小
控引江湖五岳尊閩嶺屯雲秋日瘦越臺飛雨海天昏
夜懸碧落清秋月獨照離思對綠樽

浦城登舟

秋水生南浦遙遙百粵行輕舟下江瀨幾驛到榕城烏
石穿空曲危灘第一程中流頻擊楫雲外亂峰迎

涉險

百里沿流易青山迓客多輕舸迴穩楫急峽走湍波瞥
眼鯨鰲出驚心虎豹過生涯真涉險一笑付高歌

灘行四首

初入閩溪行秋水如曳練虛舟何搖搖水石互相戰黑
摧龍虎死獍薄蛟蜃割開頭撥弩牙一發激弦箭浮沈
不可知俵俵似投竈黃頭逞巧捷橫櫂爭掣雷青山忽
旋轉浪花一澎湃盤渦過恰恰險窄目流眩回看方猶
疑怪石遽當面不知榜人力撇捩劇簾燕習坎靜虛警
猜防生數入見履險豈不戒臨淵喻誠善叱馭笑王陽
驅馳謝安晏

順溜狎層灘水強灘力弱疊石意自雄飛濤乃相薄高
者沒顛頂卑亦齧腰脚水寬舟不礙坦坦見林壑舟人

頻祭禱沽酒恣諧謔似言無十里怪石穿空惡灘多不
記名尻股互連絡長鯨揚修鬚餓虎礪斷齧潛蛟奮鱗
爪獰鬼肆拏搏前灘失鼎鑊後灘橫劒鏑此石自天生
猛悍不可鑿百粵古荒裔禹貢事殊略地險闢神工寓
目亦自樂扁舟請嘗試蛟龍莫予攫

盲風吹急雨青林暮遙霧三老爭放船廿里聲一哄排
空石玲瓏冰雪噴飛動雄濤萬馬奔朽索誰羈控機梭
輕一擲瓦注剛欲中操舟如轉丸圓熟恣調弄驚灘十
數過險處目恒送雨細哀猿啼林荒幽鳥呀黃牛吼巫
峽於菟號章貢此身將安歸一搯真入甕撇漩出死生

浮槎笑鑿空

水石以激奇險處耐頻過雄濤怒百狀怪石紛遮邏風

雷殷地底白日聽雲磨

無雨鳴雷曰雲磨

奔騰六百灘瞥眼寧論

箇黯淡名最聞獰惡稍摧挫天地本好奇山川自磨剉
轟虓誰激揚硯誰堆塚多多韓侯兵金鐵驟鈴馱森
森水府怪烟雨隨噫呵懸濤三梁奔飛流九河播一灘
驚一魂累日應難步談笑出重險安穩殊自賀山月照

歸雲林雀鳴相和先生急呼酒盡醉枕江臥

阮亭先生曰四詩寫難狀之景

如在目前抽奇闢之思得自意外非深於少陵不能也

晚泊示擎石

江流一碧照人清。魂夢猶耽下瀨驚。地險不妨酬一死，壯遊差足快平生。行依錦傘雲幢路，坐聽鈞天廣樂聲。黯澹灘頭無恙過，闌干北斗蘸空明。

建寧道上

灘平舟緩緩，煙景劇清嘉。調得芹溪水，先烹龍焙茶。清風鳴蟹眼，碧椀泛雲花。記取建溪道，青山落日斜。

延平道上二首

不識潭州路，坐看江水東。連天四山合，孤艇亂流中。秋色渾凝黛，干將尚吐虹。九龍灘最險，把酒看鮫宮。朗暎鬢眉碧，千峰翠靄環。尋秋丁字水，弔古越王山城。

郭連雲樹鄉心問，白鷗醉來看寶劍。風雨定飛還。

劍溪僧舍戲題

越山如長蛇，蜿蜒抱江岸。閩山如甕窰，盜環堵束隄。捍溪水劇懸，河千灘扼湍。悍井底天一痕，石縫流四散。蛟螭困纏縛，走險一奔竄。虛舟與之駛，馳突昧昏旦。那無青山色，過目不及看。今朝溪水平，風日美清宴。起步雲林寬，崔嵬白石矸。眼明身自健，奮袂凌霄漢。羣峰縮翠鬢，疊嶂迴波瀾。秋色照襟裾，山花紅燦爛。心驚節物改，坐厭鈞輶喚。名姓寫僧廊，他時從漫漶。

閩清道中二首

奔流峭峽兩蒼茫乍見渟泓水一方

自建溪行數百里山環水急心目不怡過古田閩清

界山開水平風景豁然矣

淨淥天容涵海色空明林影動秋光一江澹

月浮螺女百里遙山辨福唐聞道雪峰連近邑攀躋寄

與一飛揚

眠餐安穩碧江隈回首飛流出險纜路似鬼門關下過

舟疑人鮓甕邊來蟹螯入市黃初滿諫果登槃味自回

最是佛桑花近水燒空猶似劔溪開

困關晚泊

崢嶸樓閣帶煙津山戍鳴鉦月半輪螺女窺人秋寂寂

金牛沒水夜粼粼清陰繫艇看榕樹方語聲牙問舌人

正是龍睛初入市驪珠千顆擘圓勻

食龍眼戲作

楓亭舊誇鮮荔枝涎流渴吻生朶頤此來已在流火後

惜哉不及開園期龍目後出異根本品題自昔分高卑

隋侯之珠光照席一啖六百清心脾瑶林琪樹各一種

側生橫挺天無私金莖玉醴秋更潔楊梅盧橘非其時

竹崎

延平逸東惟有橘柚至竹崎則荔枝龍眼橄欖彌望皆是青空一色合抱參天山光水色人在空翠中也時龍眼下樹聞人呼

為荔奴作此詩解嘲云

困口朝發船澄江開十里烟景迴清越人家隔淼瀾夾

岸綠千章深翠籠朝晷龍睛綴秋樹甘芳醞清泚停船

碕岸傍就買殊可喜羅襦裹仙膚香潔冰去牙齒三百
解飢渴天漿和玉髓人言荔子佳熱熟飽饒哆香甜無
幾日色味頓銷毀空煩錫貢勞驛騎奔塵駛茲果乃遲
熟道左保苦李恬靜如達人幽貞比君子色既中且正
味亦淡而旨饗餐人盡饜咀嚼此方始星辰挂碧漢珠
蟻出圓水待我乘槎來風露吸清美誰將懸圃樹徧植
臨江汜橄欖恰同時青青滿棊几三復髯蘇詩名言有
知已東坡食龍眼句云蠻荒非所辱幸免妃子汚橄欖句云待得餘甘回齒頰已輸崖蜜十分甜

僧舍二首

娟娟蕉花猶帶露團團橘實未垂金僧樓晝靜日初上

惟有松篁鳥雀音

畫眉聲裏雲沈水斑竹林邊翠掃空寂莫山樓人不到
一溪榕樹起秋風

試院眎同考諸君子十二首

書升論秀以言揚科目人才軼漢唐曾是棘闈三試客
可知報國有文章

天日明神此鑒臨論文未敢負初心諸君一洗箏琶耳
聽取朱絃太古音

文教誰能拯喪亡金陳筆力繼歸唐蛇神牛鬼今時體
更與何人說短長

赤水元珠罔象求崑山良玉國工鏤文章聲價誰能沒
第一難憑肉眼收

心畫心聲久失真才華器識最難論暗中摸索知何似
只有精誠質鬼神

七閩文學起歐陽

閩人舉進士自唐歐陽詹始

道統源流自李楊

龜山延平兩先生

今日掄才愧常袞願收真士立巖廊

覓路黃茅白葦中真疑頭腦欲冬烘晶熒燈火三更夜
惟有冰輪照碧空

未溷妍媸呈水鏡誰憑關節到閻羅八千紙落如飛處
始信英雄入彀多

自是文章關氣運好從經史辨經綸 聖朝文治重熙

浹嶺嶠東南大有人

知人得士古稱難滄海遺珠世所歎一片冰心酬鉅典
敬將清白荅孤寒

雕蟲薄技漫相矜墨水猶能飲數升

時諸君皆作擬墨余亦擬程文

把視風

簷同一笑苦心聊亦誌吾曾

海岳鍾靈命世才 聖明虛竚網羅開他年建樹千秋
業記我親操玉尺來

中秋夜宴和韻

酒冷花明海月高畫簾芳讌對清寥飽看筆陣驅龍虎

笑似擣蒲荅雉梟萬里秋清分此夕五星夜聚報來朝
銀袍立鵠應相待校閱還添絳蠟燒梟音堅韻書收在元部然國策補註六朝唐宋人皆作驍音
撤棘後荅內外簾諸君子

曾是書升對 紫宸十年重作論文人春蠶食葉詞華
美海鳥搏風變化神久換綠衣荒舊業初持玉尺奉新
綸高山競奏琴三疊碧落孤懸月一輪約束鳳麟恢
帝網搜羅金鐵正天鈞雲霄自壯飛騰氣寒峻同看汨
沒伸棧樸作人歌壽考鹿鳴鼓瑟樂嘉賓諸君共以連
茹吉記取風簷托後塵

贈劉生睿

生為年家子夢余主閩試得生卷魁其經榜發乃獨見遺書此志愧

文章有神交有道書生遇合難端倪日五色乃失李廌
不二過亦遺昌黎古有文工遭鬼忌夢中得喪誰能齊
嗟子落拓仍羈栖驂騶千里蹶霜蹄為君灑淚不能別
江頭紅樹風淒淒

荔枝

荔枝干霄姿拔地十尋上將軍翦喬柯種植在盆盎團
團三尺強林林百本王扶疎羅幕府灌溉謹兵將承平
風雨時草木遂熙暢結實五月滿舁走煩丁壯遠涉江
河舟疾逾閩越嶂不飛驛騎塵已達蓬萊仗京華六千
里色味能無恙天子飽盱食羣工得分餉南北異風土

草木各殊狀閩產達幽都此事亦云翔邇來十年內珍
貢修瑤閣因知梯航力玉食古非妄蟠桃三千年王母
供甲帳禹貢載包匭橘柚跨蠻瘴葡萄安石榴致遠始
博望將軍鎮海疆包戈弓在韋餘暇樹嘉果輕帆破鯨
浪我欲叱五丁開山剷重障連根植上林桃李蔚相傍
採摘日蕃滋黔蒼荷天貺

贈別陳漳浦莘學張政和鶴峰

兩同年皆以翰林外補

全樹曾經借上林奇毛爭得伍凡禽看花京洛三年別
把酒蠻荒十載心江界雲山紆客路春城桃李蔚清陰
移情一聽冰弦奏大似成連海上音

時各有新篇見示

李忠定公祠

忠定祠堂在安危社稷臣河經制日太學上書辰盡
瘁艱難地兼全寵辱身擠排寧惜死戇直每批鱗底蘊
乘時展匡扶劫運屯投閒功不振特立善無鄰正氣山
河壯遺文學業醇孔明真漢相潛善是鄉人

本傳贊云若綱之心非諸葛孔

明之用心歟蔡京黃潛善皆閩人

廟食春秋肅青編袞鉞真臺山勵風節後

起逸羣倫

葉公向高出處略似忠定也

詠懷古蹟八首

地古無諸國荒臺竟日閒千峰秋色晚獨上九仙山
複道通飛閣湖波演漾中昆明殘劫後何處水晶宮

五牻連鰲餌投竿滄海濱囊中饒燕炙我亦釣龍人
樓閣連烏石雲邊島嶼青蓬萊不可到極目道山亭
初日芙蓉麗瓊琳洞穴藏蟲書兼鳥篆巖壑盡文章
鹿洞聞雞犬逃秦定幾家武陵無路入惆悵對榴花
我有蓮花劍經過甌冶池蒼茫烟霧起疑是欲飛時
手控金鰲背身登縹緲峰何人騎赤鯉雲海弄芙蓉

九日東梅中丞桐厓卜侍御一水高方伯敬亭

門館經時閉寂寥重陽有約不登高空齋自把泉明菊
舊雨同題夢得餽時借兩詩諸君分韻暫解離思因白隋怕傷遠目
上金鰲遙知賓從成嘉會應有新詩屬綵毫

鼓山

搯頭望三山渺若荆揚隔人言當重九攜酒向烏石鼓
山峙東偏肩輿無一驛興發不辭勞命我雙蠟屐遠遊
亦何樂選勝恣所適病目騁秋空萬里霽遙碧名山表
雄鎮奇秀自開闢蓬萊分左股尻脰冠鰲脊娟娟羅翠
屏離離列圭壁長松走虬龍臺殿陰禪窟我來把茱萸
嬉游雜賓客涼天雁叫水雲泉月在席風雨疑合離地
籟瀕潮汐回望無諸宮青山聯一髮天吳揚波濤戰鬪
自疇昔時清烽火閒道秦蛟螭格維天建旗鼓鼓山與旗山相望奠
此東南僻不寐候天雞待看初陽赤山僧揚梵唱次瀟

感行役

贈別擎石

鳳凰翥丹山鷓鴣搏南溟如何黃鵠飛也與凌青冥掄
才同被命觸熱天南征山翠拂吟鞭白雨點風旌解鞍
共郵驛放棹趁嚴程恒念兩尊人教誡兼勸懲分誼均
臣子意氣侔弟兄以此矢金石選士充王庭風簷共裁
決夜坐常達明文體軫破壞一以先正型憐君頗虛懷
謂我持鑑精去取悉由我斂手不相爭平生剛直腸忠
信與有成撤棘聽輿頌深心爲我傾君今促晨裝感我
羈旅情涼秋一杯酒馬首先神京持報倚閭人應慰心

怍怍

登烏石山戲贈金大將軍

旅人偏仄心無忮將軍同登烏石峰海天雲物肅秋爽
川原樹色紛青紅山城舊是越王宮無諸餘善開雄封
連山跨海幾千里飛雲大舶浮天風往事縱談王審知
橫海掉尾魚爲龍千山兵甲照烽火十年戰地空沙蟲
至今作鎮勞元戎森森壁壘閒刀弓時清貔貅盡兒戲
將軍整肅誰能同書生毛錐有底功投戈廝養皆非熊
雲臺麟閣高隆崇可憐秋色橫秋空登高眺遠拚一醉
不須懷古心憂忡

白使君饋荔子釀梅中丞餉武彝茶高方伯惠以
名泉戲書示客兼柬金將軍

輕裝萬里夫何有笑我區區真爲口南食腥多懶下箸
每怪當筵常袖手使君饋我荔子漿碧雲一甕含芬芳
未論鯨吸滌焦腑聞香已覺心清涼中丞致書來銀毫
貢茗頭網開山泉幾斛餉方伯頓令一時韻事生高齋
此行未及逢鮮荔紅鹽白曬無真味玉漿瑞露沁詩脾
姑射仙人成骨醉鐺邊活火回松風小龍一胯烹斜封
君子之交如水淡且從酒德論茶功此邦濱海水味惡
飲漱誰堪同溷濁吾聞貪泉酌夷齊千金一飲非所希

又聞舖糟歆醑有共醉先生獨醒將奚爲三山明月照
玻璃品泉酌酒與爾相娛嬉

閩中雜詠六首

負海憑山古七閩水天烟浪浩無津職方舊地開秦郡
東治遺封列漢臣割據幾人爭小霸昇平絕島盡來賓
方隅險隘徵前史親按圖經問九濱

舊事王陳嶺嶠偏兵屯戰壘考茫然遺孤劫運終何濟
背主驕王去幾年睽鬼戈鋌魚在釜樓船風汛海吞天
門庭養寇稽戎馬跋扈專持閩外權

幾度飛符報出師將軍勦力捷書遲天兵蹴踏平霞嶺

烽火光芒照武彛攻穴顛連逃困獸連營歌舞擁妖姬
彭臺洲渚鯨鯢死廣武成名自一時

聖朝長養佈春溫二十年均雨露恩職貢梯航來海外
文章冠冕埒中原戍兵吹角巖城晚番舶迴檣水國昏
貴胄不須登壘斷漁蠻蜚鬼足游魂

江抱閩城海浸山東南雄鎮鎖層灘雙峰旂鼓芙蓉秀
黑子琉球島嶼寒賣劍買牛人負耒投戈授鉞將登壇
時清綏靖多文史尚覺川原景色殘

紅荔丹蕉燦錦屏滿城榕樹四時青洋花入市兼冬茂
鮭菜登槃帶海腥金鎖江寒山寂寂釣龍臺迴水冥冥

秋深節候多蕭瑟縱覽憑高命淥醪

題林吉人焦山古鼎考後二首

神物猶能歷劫存庚丁癸巳字誰捫君才手續明誠錄
好並陳倉十鼓論

幾度探奇吞海亭風潮嶺樹海天青而今水落雷轟石
更約同尋瘞鶴銘

欲去

欲去還爲信宿留山光海色動行舟歸心夢破三更月
病骨神傷萬里秋映水蠻花關客恨背人征雁說鄉愁
灘高峽急來時路爲報先生已倦遊

白雲寺二首

白雲翳秋厓修篁帶崇阜縈紆入山路驚濤喧谷口澗
作靈鼉鳴石作蹲獅吼溪光懸洞戶嵐翠撲窗牖徘徊
水石間白日誤卯酉翻憶嶺南來亂山紛雜蹂急峽苦
偏仄靈妙閱諸有快躋蕉蘭巔諸峰窮背負烟霞各有
癖放浪真吾耦悠然雲壑身長嘯狎溪叟

天資踈曠人束縛謝羈鞅秋日照征衣輕策入林莽雲
荒山徑窄尺寸剗平壤松竹挺菁英洞壑匿夔魍山僧
趺坐處跳沫或泚頽琤琮巖下流雙派瀉於掌亭亭醉
香閣十笏莫夷敞掩映六橋樹紆折散幽賞聞天簇萬

峰福地迴蕭爽逍遙對猿鶴歸橈懷獨往

明霞閣

一上江天閣明霞開晚晴林疎秋入畫山響鳥無名水
落橫灘淺舟牽怪石爭我來曾泊處煙月憶空明

大中丞范公殉節詩

強藩作逆海天昏身殉封疆大節存儀馬弓刀仍擊賊
靈旗風雨一招魂死生不負安危寄忠孝全歸將相門
今日榕城猶廟食功人功狗更誰論

上灘雜詩八首

又涉層灘險牽舟逆浪行秋深山氣肅石瘦水痕清無

復風蟬響空多野鳥鳴人家橘柚裏落日數峰明
夜靜疑風雨平明過幾灘君看放船易何似逆流難積
鐵黏磁石乖龍戰急湍千峰淨寒碧翠色當朝餐
川路行仍盡波明峽轉開天荒人跡少林透鳥聲來黯
淡險猶昔蒼茫首重回來時飛溜處高岸有殘苔
濕翠飛寒雨驚灘暗夕曛天旋人力盡峰轉浪頭分竟
日穿烏石多時望白雲西風有霜信征雁幾回聞
不見峰銜月橫空怪石多幽如行隧道冷似逼天河海
霧迷珠斗山魍翳女蘿客心念行役頭白此山阿
鼯鼠知多少層灘廿里強深流纔噉足浣濯豈拖腸

老荀

鼠灘沂
流最難

揚龍恐波瀾壯將軍壁壘長於菟已馴伏出險與飛

障日一青壁排天雙翠屏秋殘寒作雨峽靜夜占星遠
戍荒鉦出幽厓落木零風燈將濁酒吟嘯此沉冥
幾日爭重險飛湍客興慵蕭條過山驛寂歷數雲峰人
坐翠微冷林開霜露重宵來故園夢驚斷佛樓鐘

延平先賢祠下作

延溪龍化處雨過水猶腥濕翠看天柱荒祠拜考亭桂
花寒作蕊魚翠晚梳翎楊李傳經地停舟問典型

百丈

○百丈層灘盡力牽歸人坐以日為年白波籠霧飛如雨
黃葉無風落滿船怪樹枝撐秋色裏頑山堆疊瘴江邊
天涯客思真愁絕望斷寒雲古驛前

將度嶺寄題武彞山放歌

馳驛例不紆道武彞距嶺路二百里不能游也

○噉生荔子登武彞閩遊快事無逾斯我來乃在八九月
火齊落實餘高枝一江空碧駛萬馬扁舟出沒追鳧鷖
山逼堵牆遮望眼誰能破險為娛嬉飽聞武彞接黎嶺
壁立萬仞臨幽溪溪流曲折山宛轉峰峰秀削爭恢奇
仙靈窟宅非人境幔亭觴樂開屣屣雲幢錦傘張葳蕤
翠屏瑤席光陸離次姑小娥妙歌舞緩調國腹吹參差

武彞之君凌烟霏驂駕鸞鵠龍夔踞玉漿麟脯羅甘肥
衝筵徑作不速客曾孫下界知吾誰胡為勞勞疲形役
山郵計日行相催控鶴仙人應笑我棹歌九曲津豈迷
安得招攜費長房不然相邀華子期荔枝冬熟彞山移
漁梁嶺外同攀躋

試茶

一甌龍焙勝中冷小甕銀毫買建寧欲調寒泉攜水譜
武彞深處試茶經

浦城雜詠

青峰萬疊插雲尖遠溯層灘亦未嫌獨羨夢中傳綵筆

丹山碧水著江淹

花前月下柳屯田樂府才名四十年無限青山楊柳外
曉風殘月建川邊

登冷風閣

螺鬟高聳翠檀鬪照眼千峰遶檻看十月山城圖書裏
天風吹透不知寒

舟中讀宋先賢傳

舊傳閩海多君子羅李游揚一代中師友淵源傳正學
山川清淑想遺風春秋不廢胡文定衾影無慚蔡季通
猶有荒祠南劍在何人獨任表彰功

寄莆田友人索鄭茶

夾漈祠堂鄭氏家山川勝概任君誇子魚鮮荔誰能喫
第一先尋穀雨茶

讀山堂先生遺書感興書其後

十年去國讀書多考索精研論不磨一語爲君成浩歎
士風變盡擬云何

嶺中雜詩六首

十月征旌嶺上迴蕭蕭楓葉點霜纔西風不奪南枝煖
已有梅花映日開

碧玉溪流漱石寒高低嶺路認雙竿銀河瀉處青山缺

沸耳驚疑又一灘

烏銜猿挂映晴嵐磨蟻迴旋怪石鑿行愛漁梁山色好
雲巖深處訪名藍

簇簇雲峰寫碧天林塘濕處雨如煙北風未覺衣裳冷
行入兜羅一色綿

嶺頭三日犯清寒吳越山光地底看重到沅霞池上坐
石臺秋色半凋殘

窄磴雲荒艸樹稠初冬風景尚如秋羈人欹枕渾無寐
臥聽山泉一夜流

須江雨舟二首

野曠林昏嶺路荒東風吹雨濕江郎籃輿觸熱江山道
又撥寒雲上越航

須溪煙雨客途寒上盡閩灘下越灘誰潑丹黃寫江樹
一天濕翠染峰巒

衢州道中三首

十月三衢道風烟似二分禽聲噪初日山翠拂寒雲水
落灘灘響林多樹樹醺乘槎滄海客歸興繞江濱

紅亞搜林橘青分刈蔗田鎔霜應可買火齊不論錢姑
蔑山凝黛蘭江月隱天霜華助淒冷惆悵暮愁邊

眠餐寄雲水日夕大江濱樟老疑藏魅楓奇欲化人成

殘寒柝晚霜冷雁羣親寂莫魚龍夜悲歌感問津

胥口

半江寒霧曉濛濛睡起烏篷日影融山掃黛眉開曉鏡
雲披素練捲晴虹夢清瀨石雙臺裏身在琉璃色界中
最是驚濤喧客枕夜深然火照鮫宮

疊耕字韻同兩詩

幾日牽舟鏡裏行寒山處處畫眉聲釣槎水落無漁笛
土堠烽消有戍鉦烟景盡誇嚴瀨好詩篇難繪越江清
丹楓翠篠千林色何日同君事耦耕

重過釣臺分賦

扁舟來往水雲間悵望高臺不可攀十載風塵生白髮
一江煙翠愛青山每經此地堪忘返卜築他時想就閒
祇恐英靈謝逋客半生攘攘在人寰

又題絕句二首

匹夫抗高節天子不得臣君房自素癡那用見故人
停船酌江水對此一日閒鱸魚不銜釣白雲生四山

富陽晚泊

千峰銜暮雨煙景浩難分城郭環青靄人家在白雲漁
榔歸曲港山木界斜曛客思紛難語簫聲隔舫聞

赤松山

輕舉何年似赤松
穀城黃石想遺蹤
富春江上山如黛
盡是仙家湯沐封

孫洲

共羨生兒似伯符
江東王氣亘三吳
孫洲近接瓜疇路
惟有青山入畫圖

桐洲石瀨

富貴冥鴻一羽輕
釣徒忘世未忘名
幾人阿諛全腰領
應笑狂奴非世情

妙庭觀

桂殿夜涼吹玉笙
仙人不見董雙成
碧霄有路鶴飛去

十里下山空月明

錢塘江上四首示兩詩伯恭諸子

雲幢絳節二千里
繡嶺錦峰一萬重
誰寫丹青行看子
錢塘江上水溶溶

風馳雨驟晚潮來
掀舞吳山越嶠隈
好架錢王鐵牀弩
三郎廟口射教迴

隔岸吳山刺眼明
回頭悵望越江清
千巖萬壑爭奇地
更想山陰道上行

坐憶千峰翠掠烟
虛槎使客不徒然
燈紅酒煖樟亭岬
又聽江濤失夜眠

吳山吟望

形勝三吳壯風煙百粵開鳳翔天目下潮突海門迴王
氣何年歇婆留一代才青山自終古白塔幾蒼苔獨上
吳山望興亡事可哀笙歌湖畔舫樓閣劫餘灰纜石秦
舟麗行宮宋瓦隕西風武林樹落日大觀臺望幸謳歌
起時巡翠輦來遙看六橋外花柳又重栽

舟泊關口同兩詩作

摒擋曾無一鶴裝越江山水未能忘浮槎空說遠遊好
久客真嫌歸路長十月丹楓明古驛六橋烟月憶寒塘
吳天蕭緘關河晚濁酒殘燈野岸旁

訓漫堂宋中丞二首

坐鎮東南十四春三吳宦業繼周忱韋平家世傳經術
江海藩屏得老臣鼓角晝閒森畫戟樽罍夜洗集詩人
騷壇俎豆綿津久更許何人托後塵
夙昔南豐一瓣香論詩酌我小滄浪左司後跡文章在
白傅前身鬚髮蒼物外搜羅歸大雅箇中精義析三唐
漁洋薄海誰爭席惟有商丘與抗行

題漫堂中丞滄浪詩志後

宋玉宅存因庾信謝公墩在屬臨川中丞買斷滄浪水
併與甘棠異日傳

白傅文名替左司蘇公亭子宋公詩而今海內論風雅
多少才人待主持

和兩詩韻二首

洛浦曾捐玉珮要柳陰花底駐蘭橈赤欄干外橫塘水
記與東陽照瘦腰

水暗方塘夜泊船明燈濁酒共陶然三更玉笛山橋晚
海月清寒照獨眠

虎丘再和

勝地何妨屢問津酒船燈舫聚遊人拂雲鐘梵伽藍古
踏石笙歌傀儡新沉劍池荒銀海闕生公臺迴鐵花皴

參天樓閣浮雲起豔說明年玉趾巡

東林書院弔端文忠憲兩先生

師儒壇坫鬱相望獨數東林道脉長豈有黨援標俊及
空將門戶閱興亡雲邊大鳥悲荒塚檻外清流護講堂
鼎鼎百年遺澤在九龍山色共蒼茫

喜家弟來迎同賦

絲絲寒雨濕江城臥聽孤篷浙瀝聲小雁一行江上過
眼明風雪遠人情

江上

北風吹面白雲生蹴踏鼃鼃正不平濤似浙江寒更急

雪漫京口曉初晴
揭來八月乘槎客
獨對三山擊楫行
蘆荻蕭蕭戰淒冷
浩歌醜酒酹空明

抵家留兩日拜別北上

衰顏白髮共鬢髮
乍喜承歡欲別難
笑語且欣筋力健
征行敢憚雪霜寒
君恩暫許歸軺便
親舍仍教萬里看
漫聽鳴騶催曉發
西風吹淚濕雕鞍

渡河二首

濁浪兼冰雪西風駛
急流岍崩穿穴蟻沙築
臥金牛
上策何年用奇功
已自收宣房勞改築
法駕報東遊

上以九月巡河行次德水
回鑾改於明年正月南幸

望幸東南切鑾輿且暫停
天行勞四載國翊三靈
沉璧訶河伯浮槎記客星
哀鴻且中澤計日起沉冥

雪後山行

不辨空林路茫茫
雪後天山嵐明曉
霽溪鳥破寒烟荒
戍鳴征馬村姬汲凍泉
昨宵呼酒處回首亂峰邊

沂水道中感興

歲月忽云晚風塵殊未閒
重過沂水岸遙認穆陵關
白暗空林雪青來何處山
一鞭寒日影拭目破愁顏

蒙陰村店

又入東蒙境千峰畫裏看
雪漫溪水白山壓縣城寒旅

鬢霜華改征途歲月殘醉歌村店酒行路古來難

萊蕪道上逢王銅仁珂雪即送之任

萬里牂牁百濮通單車臘月向黔中天連參井開莊國
地轉沅湘漏禹功去日雪霜飛驛騎到時耕鑿徧春風
甌塵魚釜萊蕪操瘠邑官衙况味同

戲贈二首

鳧鳥依依共此行冰林雪被算遙程風前執手誰能別
脉脉空傷萬里情

杯酒臨岐意若何半年羈客恨爭多海棠過雨松顛月
腸斷花陰一曲歌

宿處

泰安行役路宿處近諸峰夜暗雲巖樹風傳岳廟鐘海
門看日出雪徑夢支筇記取水簾外寒冰凍玉龍

歷城道中

冰雪嚴程驛騎賒坡陀朔吹轉谿谷湖涵碧藻凝江練
山矗寒空卓虎牙古戍夕陽閒牧馬深村老樹噪歸鴉
眼明十里西郊路趵突泉飛一道斜

新城道中

竟日征途困據鞍瑤林一色路漫漫雲迷川壑詩思潔
雪滿弓刀騎從寒山影忽從天外出行人如在畫中看

故園南望空回首鴻雁高飛健羽翰

易水旅舍

蕭蕭風雪馬蹄輕易水寒波近
帝京不用悲歌更懷
古一杯茅店旅人情

曉渡桑乾二首

橋下桑乾凍不流星軺臘月返盧溝停驂試望西山色
不是征人也白頭

使客曾無陸賈裝蕭然行笈凍冰霜
帝鄉此日無多
遠極目南雲雁一行

